



洪太史編輯國朝獻徵錄卷之六十八目錄

大理寺

掌寺事尚書

楊守隨

卿

虞謙

王宇

王霽

田景暘

燕忠

陳珂

陳恪

湯沐

葛浩

三

胡丘

汪文盛

李珏

李香

余胤緒

張夢鯉

張鹵

宋儀望

少卿

胡閏

薛崑

傅啟讓

沈粲

仰宗泰

李奎

徐正

李茂

劉慶

董怡

羅輅

商為正

寺丞

鄒瑾 一作公瑾

劉端

王高

彭與明 一作民

孫珂

汪淵

周鳳鳴

張鵬

成守節

寺正

嚴本

寺副

王敬

李芳

評事

林公黼

焦太史編輯國朝獻徵錄卷之六十八

大理寺

掌大理寺事工部尚書楊守隨傳

掌大理寺事工部尚書楊守隨字維貞浙江鄞縣人
成化丙戌進士授江西道監察御史庚子陞應天府
府丞丁未調南寧府知府弘治戊申陞應天府府尹
已丑調廣西布政司右叅政甲寅陞廣西按察使乙
卯陞南京都察院右僉都御史提督操江丙辰陞南
京大理寺卿庚申改大理寺卿乙丑以九載考績陞
工部尚書仍掌大理寺事正德丙寅致仕正德十五

年六月卒賜祭葬贈太子少保謚康簡守隨爲人敦樸少邃易學與從兄吏部侍郎守陳從弟南京吏部侍郎守陟相砥礪雅有士望居官剛直建白甚多遇事無所顧忌爲御史時嘗按贓吏李孜省罪及孜省以左道得進遂調南寧爲府尹時嘗按太監蔣琮罪爲所中遂調廣西爲大理時嘗偕三法司讞太監瑜獄抗衆杖之必欲盡法與內意忤遂致仕未復劉瑾所構繫獄凡八年罰粟凡千石守隨素清慎至屢空而其心裕如也

嘉議大夫大理寺卿金壇虞公謙墓碑

楊士奇

公諱謙字伯益姓虞氏虞之先家河南陳留代有仕籍宋諱南者從宋南渡遂家金壇世業詩書南六世至文寶生仲仁公祖也祖母徐父德華母周以公貴祖父皆贈嘉議大夫大理寺卿祖母母皆贈淑人公自幼秀朗端重異常兒聰敏好學洪武乙亥由太學生擢刑部山東司郎中授奉議大夫陞杭州知府授中順大夫 太宗皇帝入正大統召爲大理寺左少卿授中憲大夫永樂己丑車駕巡北京時 仁宗皇

帝監國奏陞都察院左副都御史授嘉議大夫甲辰
轉大理卿公自少壯有志世用旣仕恪勤夙夜務盡
職分持大體恒曰爲臣之道愛君愛民二者愛君崇
其德愛民厚其生初爲郎中已駸駸起時譽在杭州
嘗建議僧道民之蠹今江南寺院多者或數百頃而
官府徭役未嘗及之貧民無田往往爲徭役所困請
爲定制僧道每人田無過五畝餘田以均貧民初是
之已而謂非舊制遂寢陞大理寺卿都察院論誑騙
准洪武榜例梟首示衆公奏言比奉詔書自今准律
斷罪誑騙在律當杖而流梟首非詔書意 上曰虞

謂古是竟從律天津衛倉災焚糧數十萬事聞遣御
史廉視還言主者盜用多故縱火以自蓋追逮幾八
百人不勝考掠皆誣服應死者百餘人餘坐徒流察
其寃卒白於 上得減論於兩法司具獄及四方所
上獄議必親閱之必當必平於大辟罪尤加意曰彼
無憾斯我無憾矣爲都御史嘗奉命巡視揚州淮徐
州旱災至則疏民所苦請發廩賑貸又請官贖還所
賣男女爲奴婢者皆從之又奉命督兩浙蘇松諸郡
逋賦輸南北京及徐州淮安先是富民賄有司率得
近地而貧民多運北京公建議爲四等丁多而糧最

運北京丁多而糧次者運徐州丁糧俱中運南京
淮安丁少而糧多存留本郡縣倉又言兩京往來官
員軍民商旅舟聚徐州呂梁二洪動一二月不能進
者請每洪增夫二百人協力挽送如例給月糧仍官
撥牛每洪一百分畜近洪民家閒暇聽民以耕大舟
行則用挽之亦皆從之又督運木道潁州陽武陸行
下衛以達北京所督軍萬餘公節其力而厚撫之人
不言勞會夏暑疫役者多病公曰此聚之過密宜疏
暢之遽命散處之病者悉起奉命巡撫浙江察廉糾
貪用建議便民十數事多見施行 仁宗皇帝嗣位

於刑獄尤隆欽恤而嚴大理之選曰是天下之平也
於是大理寺卿闕遂改公爲卿時有詔求言公上言
七事其一用人曰用得其人則治道興非其人則治
道墮人主之職惟在擇人而已二興學校曰教育之
道本於師範今內而祭酒司業外而郡縣學官不在
於備而在得人庶有成效三曰都察院耳目綱紀之
職用以激濁揚清雪理冤抑今專俾治獄非朝廷設
風紀本意四曰廣儲蓄今國用空乏宜預爲備五曰
北京八府之民困於養馬極矣宜分給無馬郡縣牧
養以蘇畿內六曰鈔法不通其弊原於出多而入少

仁多方收之而不輕出民艱得鈔則自流通七日
京師盜賊之繁由軍民雜處官司不便管束鄰里不
相通知今固不能遽釐正之宜勅五城兵馬司於各
坊街巷不分軍民工匠每十家編爲一甲使互相覺
察出入一家有犯十家連坐有能捕首免其連坐之
罪庶輦轂之下可以肅清皆切中時務蓋公於爲臣
必思盡其所當然者一日朝還得風疾上命醫往
視賜藥歷半歲竟不起宣德二年三月廿四日也訃
聞賜祭給舟還其喪命有司治墳其生以丙午歲正
月二日享年六十有二其居家善事父母父母歿喪
祭咸盡禮於其弟友愛與人處溫恭怡怡其儀觀偉
然風采凝潔瀟灑絕俗也以詩名於時所著有玉雪
齋稿若干卷喜寫山水木石幽澹簡遠有倪雲林韻
致嗜蓄法書名畫邂逅心之所好輒贈不靳

通議大夫大理寺卿王公墓表 李賢

公諱宇字仲宏別號厚齋河南祥符人曾大父敦本
隱居不仕大父友德父希哲俱以公貴贈通議大夫
大理寺卿母丁氏封淑人公自幼穎秀異於羣兒父
母獨鍾愛之童州時從師受業日記萬言巡撫侍郎
于謙一見之曰此遠大器也卽遣爲邑庠生正統戊
午遂發解鄉闈明年登進士第擢南京戶部主事剗
革宿弊廉能之聲大振都憲周銓時總京儲篋視屬
吏見公獨敬愛之三載以績最進階承德郎公益砥
礪名節在郎署中特立獨行不顧流俗時郎佐秩滿

例轉正郎吏部以公才能顯著薦陞江西撫州知府是郡地儉民夥素號難治公至以簡御煩闔郡翕然稱頌里有隱士吳與弼以道自高足迹不至城府公欲往造其廬與弼聞之卽先詣府謁拜接談竟日乃嘆曰真明府也公益勞心民事凡漁利害民之弊悉罷之吏有奸黠者盜府金自若公廉得其狀置於法衆皆畏服以爲神明撫民多商給之錢歲計累萬前守皆自取以爲當然公曰可以勿取而取之是傷廉也悉以屬官郡治傍有穴地前守引水畜魚以自給公以土實之爲倉儲粟數萬石以濟饑民郡人題其

壁有關節一毫無地入公廉兩字有天知之句遠邇傳誦宜黃多山虎爲患公爲文告神而驅之虎皆遁去金谿有聚衆暴掠者公曰此吾良民迫於饑餒故耳卽開倉濟之衆皆感泣曰真吾父也卽時散去藩臬書公績曰剽繁治劇才識有餘清白操持纖毫無玷都憲巡撫者上公治行於朝特賜誥命以旌異之進階中憲大夫天順改元 皇上復位首念方岳重臣爲郡邑表率屬廷臣會薦公在首選遂陞山東右布政使時廷議山東累歲不登民皆流移必屬能者撫安之 上以璽書托公凡賑濟之策不遺餘力民

賴全活者數十萬人明年 上念宣府北邊重地宜
得憲臣巡撫遂召公爲都察院右副都御史以往公
至訓練士卒堅完城堡凡芻粟屯田邊備戎務一切
便宜處之剗弊刈奸士卒感恩而權貴則不悅矣賴
上知公爲人譖毀不行未幾兼巡撫大同時石亨
與其姪彪皆驟遷高爵恃寵自肆而大同乃舊鎮之
地索取尤橫衆莫敢撻公獨上章劾之以爲大蠹大
奸莫甚於此乞置於法以消未形之患詞氣剴切聞
者嘆服已而亨彪果以奸敗朝廷益嘉公忠直庚辰
丁內艱還家一年 上起復公至京將有南臺之命
忽大理卿缺員持天下之平者無踰於公遂以命之
累章懇乞終制弗獲在任惟以洗冤澤物爲心清研
獄狀務得其情不知案牘之勞形也癸未春進階通
議大夫公質幹奇偉心性剛介慎廉隅重名節操履
端方確乎不可拔事親盡孝處兄弟篤於友愛自奉
甚薄雖居顯貴服食不異寒士視貨財如汙穢見不
廉者若將浼已避而遠之卒之日囊篋罄然無以爲
斂 上聞訃惻然傷悼曰可惜佳士遣官諭祭其家
復令有司營葬事

大理寺卿王霽傳

實錄

大理寺卿王霽字景明直隸上海縣人天順四年進士拜南京刑部主事遷員外郎再遷郎中累辯疑獄有能聲遷黃州府知府嘗有虎害火災又江水嘗暴至懷民廬舍禱祈祝有應以是民愛信之遷廣西叅政未幾遷江西按察使進太僕寺卿時馬政廢弛霽條陳十事奏行之宿弊爲之一革用薦遂遷僉都御史巡撫山東值歲饑民多死徙霽爲區畫銀五十餘萬兩米二百萬石賑之存活者甚衆召拜大理寺卿稱用法平易弘治九年九月卒賜祭葬如例霽務爲

和厚所與交無不得其歡心雖與隸輩亦鮮有怨之者故歷官中外三十餘年所至皆因以得美譽云

大理寺卿田景暘傳

實錄

大理寺卿田景暘字時中保定高陽人登景泰甲戌進士授山東道監察御史陞大理寺丞累陞左右少卿進本寺卿成化乙巳致仕歸景暘爲人峭直精敏有幹局爲御史甚著風裁按治所至貪墨多斂迹推掌三法司事彈劾無所避在大理持法不撓詳讞平允後因子無行自度戒不能悛陰使人殺之事浸露景暘懼遂引疾去時年五十九在林下餘二十年正德元年正月卒

通議大夫大理寺卿贈刑部尚書燕公忠墓志

銘

楊一清

予讀宋史見所載名臣如包希仁之峭介關節不及其門趙閱道之廉直爲御史糾彈無所避入蜀以琴鶴自隨嘆曰爲人臣者當如是其在我國朝若太康顧公之總內臺正色直道後鮮克儷近時仕者守不勝才通常掩正軟美循默之俗相習而不知戒嗚呼此燕公之所以賢於人而其死爲可惜也夫公名忠良臣其字別號西谿起成化甲辰進士丙午授常州府推官歸守內艱服除改寧國府兩郡故多豪右莫

敢窺其庭戶凡所讞獄多平反民某賈於江淮間其僕偶有過被笞怨家嗾之曰汝爲彼服勞尚汝笞不汝庇汝復何恃盍爲汝圖之遂與僕殺其主於采石因盜其貨愬於官罪人久不得公廉得其情捕而鞠之遂伏辜郡大旱承檄發官廩賑卹多所全活弘治甲寅被徵爲福建道監察御史歸守外艱戊午服除改浙江道以災異陳親賢納諫重名器節財用嚴賞賚諸事言甚剴切 孝廟嘉納之庚申出按陝西力舉憲度風聲凜凜雖方岳重臣未假以辭色周歷郡縣不憚險遠賊吏望風多解印綬去諸司有過輒惕

然曰恐巡按知之民有不得其平者則曰吾將訴諸御史執政者有所親厚被摧折乃病其苛察壬戌遷陝西按察副使整飭環慶兵備至則留心戎務日訓練防禦不少懈虜入罔害是時予受命修舉馬政始建議以藩臬之賢者補卿寺官正德丙寅吏部推薦爲陝西苑馬寺卿至又留心牧政馬用蕃息戊辰擢陝西按察使發奸擿伏如巡按時禁和買之弊裁省里甲支費三之一庚午進左布政使以簡靜爲治往時公罰聚斂以給用使因自封殖至是一切禁絕瑾賊方柄國附者瀾倒陝固鄉土所尤屬意公獨無饋

遺干謁瑾雖銜之卒莫能害也寧夏變作經畫軍餉
食足而民不勞予起廢西征相見慰之曰別君數年
此何等時也風操尚爾耶比還朝遂特疏薦之辛未
擢都察院右副都御史巡撫宣府軍政一新是年冬
改大理寺卿執三尺惟謹不肯少有推移貴近有所
請托必正色拒之知州田崑爲人所訟上怒其不
敬將寘重典公屢疏雪其誣竟得釋有胡某者烝父
妾因毒殺父行厚賂祈脫免所司緩其獄公曰罪孰
大於此牒至輒駁之屢牒屢駁會奉使江西而止江
西藩臬官交惡相奏訐致興大獄久不決公受勅往

獄成無異言屬歲饑民重困再授勅賑濟驗丁口給
粟民賴以不死甲戌滿三載奏績得推恩賜誥命仍
廕其子爲太學生初吏部擬薦公爲吏侍及兵侍皆
不報或諷使少貶以求進公曰大臣進退當以正求
而得之人將謂何竟不及再命而卒性狷介峭直居
常寡言笑不輕交際人望而畏之有包趙之風焉自
奉儉約在仕途三十年祿入僅供朝夕田園邸舍無
所增置卒之日囊無餘蓄訃聞上遣官諭祭命有
司營葬事吏部奏公剛正得大臣體法應贈典報可
贈刑部尚書蓋異恩也生天順己卯八月五日其卒

以正德乙亥正月七日壽五十有七

大理寺卿東瀛陳公珂墓志銘

何

嘉靖辛卯秋九月朔大理寺卿陳公卒訃聞遣官諭祭營葬公諱珂字希白別號東瀛曾祖榮甫祖思誠考昱累贈奉政大夫母朱氏贈宜人公性至孝友伯仲五人日侍父母養聚首一堂怡怡無間言成化甲午補郡庠弟子員庚子以易領鄉薦弘治庚戌登進士第公念母年高乞恩歸省五閱月母沒居廬三年癸丑授刑部四川司主事奉勅錄囚南畿御史樊祉知府程灤故出重囚公劾之皆得譴還朝陞本部員外郎榮王啟封國於湖南陞公工部營繕郎中董其

役既至潘博士夔相地當徙民民不適有居公多方處分不失其所民安而事集辛酉轉刑部郎中河間密邇京畿繁劇難治大司馬白康敏公舉公出守公至去苛削之文斥乾沒之吏先是山水衝決民蕩析離居公思所以還定之攢木畚土甃石爲隄六十餘里水安故流民復業者四萬餘口時又值亢旱公徒跣禱於山川雨如注冬無雪傷麥復禱輒應麥有秋獻縣民李政訴盜殺其叔李文子林劉信妻亦訴盜殺其夫公謂安陵誰辨削礪工邪牒於城隍是夜夢雖狐臥繡帷中起首指徨徨欲言公寐召林妻宿錦

之得其情捕盜劉永王幹及李政劉氏俱坐謀殺死吳鑑坐強盜死闔郡稱爲神明巡按御史李璽奏聞於朝銓部亦以課當最擢福建左叅政遷按察使時內使陶錦怙勢張皇公正色危言無所諱陶亦自戢不敢恣睢逆瑾用事遣御史捕鹽徒盜賊甚汎濫公亦屢與之抗民賴以安陞右布政使武平大帽山鯨賊猖驚爲公便宜發帑中錢具糗糧芻茭給官軍賊就戮轉左布政使設賑貸之法定徭役之條寬舶商椒票之征建通濟橋七十餘洞民咸利之浹期陞都察院右副都御史巡撫河南去後常見思乃爲建生

祠尸祝公又援借寇故事立四借亭於通衢以比甘
棠見素林公紀其事甚悉嗚呼公何得民之深如是
也其巡撫河南適流賊之餘邑里無儲峙賊黨孫郁
等尚爲民梗公首命兵勦平之仍命有司收瘞餘骸
勒石表男女死節者又申寃獄知縣袁鑑指揮葉章
等五十餘員俱附奏請得麗末減新野縣當荆襄之
衝內官私置抽分廠漁獵民公檄守巡官毀之罪其
導爲者汴泗東南河嘗決歲徵修河夫寬剩錢公議
河決不常可緩歲所徵以與民民力稍紓正德九年
春二月沔池縣河清二百餘里公具疏以聞因言宜
延德祇承休命 帝曰俞十年入爲大理卿保定民
吳澤詐稱觀音現夢佑澤後當大貴弟海復傳播以
誑愚民倖臣朱寧詞得之差官校擒澤等二百餘人
以謀反聞刑部送澤等至大理寺復審公駁議止坐
澤妖言海用傳妖言律斬餘從寬貸具列上 帝竟
俞公議是年以論免歸公敷歷中外三紀章疏無慮
數十餘大約皆經世大猷發先賢遺意其陳應議六
事曰均田賦以平穀祿曰便折納以蘇民困曰省征
斂以厚民生曰清稅糧以寬逋負曰致刑辟以章憲
法曰謹作養以重世廕其陳贊畫安邊大計三曰制

勝曰教勝曰器勝頗見施行其論河南平原野戰以車爲主宜倣古爲麗偏箱之法番長於馬漢長於弩宜各任所長時未及用識者韙之所著有武經發揮孫子斷註行於世及東瀛集九溪吟藁奏議若干卷藏於家

大理寺卿陳恪傳

實錄

大理寺卿陳恪字克謹浙江歸安縣人成化丁未進士授宿松知縣擢監察御史江西按察副使整飭南贛等處兵備正德初逆瑾用事以冗員例革尋復以爲御史時事株連削藉瑾敗復起爲貴州副使提督威清等處兵備陞貴州按察使山東右布政使河南左布政使改江西時方朝覲吏部奏旌天下能吏恪爲首尋陞右副都御史巡撫南贛汀漳諸郡改大理寺卿正德十三年四月卒賜祭葬如制

大理寺卿沂樂湯公沐傳

張璧

沂樂公者常州江陰人也姓湯氏諱沐字新之大夫
 諱鏞父諱虞號厚菴以公貴俱贈通議大夫都察院
 右副都御史公髫髻即警敏甫冠為諸生博聞強記
 名歛起乃論秀於鄉遂高薦時成化丙午也弘治丙
 辰舉進士試政戶部監太倉大司農甚善之丁巳出
 知崇德崇德政積弛公至則裁決無留務可廉問民
 間利苦罷行之流愛於人人為立生祠祀公居三年
 當道上公治狀徵拜山東道監察御史奉命巡內帑
 錢穀督河東鹽池弊端多所釐革繼按山西劾賊吏

振士風郡縣官望風懼伏正德戊辰擢湖廣按察司僉事公受命取道過家展墓而謫官武義命且下矣乃時逆瑾竊政銜公清不染俗勇不避難剛不徇物介不趨時遂見忤有茲謫云公至武義如在崇德時有流愛焉庚午瑾敗伏誅詔伏起公廣東按察僉事兼督屯田饑政先是奸貪在位多蠹政公極力汰除不遺餘力政聲播聞壬申遷福建按察司副使明年入覲時遂菴楊公爲冢宰最嚴吏治乃應詔薦天下諸司才堪公輔者僅十六人公與焉上賜綵幣羊酒示褒顯云尋轉江西按察使乙亥擢浙江右布政

使丁丑轉廣東左布政使會今上入繼大統陞都察院右副都御史巡撫貴州癸未改巡撫四川其在浙江毛九寇孝豐在四川芒部寇松藩公率衆平之上嘉乃績有白金文綺之賜故望益隆赫凡兩京部院卿佐缺員必首薦公乃乙酉徵拜大理寺卿公素修謹至則凡所審鞠志在奉公嘗語僚屬曰法者天下之公苟惟意輕重非示天下以公也又曰因情求法故有不可入之刑移情合法則無不可加之罪未幾有五臺山人罹重法者父子當殊死訟詣京師上下諸司覆訊公三奉讞忤上意乃與顏尚書

頤壽等並坐免官歸始公入長大理受 上眷知每
 侍經筵數賚賞及上方御書公益感激圖報乃不虞
 禍與機會竟緣是去惜哉公歸江陰城南有故田廬
 督耕自給且為園蒔菊數百本花時延客宴賞其中
 又間與耆碩為鄉會取適性坦率不為鈞距見賢者
 愛之不啻已出尤善汲引後進居嘗慕浴沂黠也之
 風故號沂樂以見志平生孝友天至雖其先人早逝
 然歲時廟祀孝敬不衰撫其弟泐極親愛歷官清白
 歿之日家無餘財生天順庚辰十一月卒嘉靖壬辰
 八月得年七十有三

大理寺卿贈刑部右侍郎葛公浩墓志銘

瞿景淳

公諱浩字天宏敏而嗜學弘治己酉以禮經高等領
 鄉薦丙辰登進士第初授五河令五河故小邑時復
 傷旱澇公省科役賑貧窮流民知歸遂為完邑復申
 學政以身為師羣士靡然向風在任五年以考最剋
 進階勳封壬戌召為南京廣西道監察御史會災異
 卽上疏請正心術信命令選憲臣慎考官處輸納嚴
 武備重刑憲設險要劾戶書某貪鄙請置之法 孝
 廟上賓請正侍醫劉文泰之罪連及中官 武廟初

教坊請選取樂工公以教坊非先王之樂諒陰非聽樂之期手疏止之時逆瑾弄權公率同僚請斥之以正國法疏入下公錦衣獄杖黜爲民瑾復摘以他事下公南錦衣當是時公蓋幾不免而意氣自若也後瑾誅起公知邵武府公至則與屬邑裁濶狹貞賦役俗故尚巫男女聚會無別公下令禁止民有兄弟訟者公諭以倫理至情對之洒淚兄弟立感泣讓所爭而退越甲戌應朝奉詔陳利弊乃請通融里甲平處徭役均派解戶改編馬夫清理漁課嚴禁幼昏事皆施行在郡六年民多歌之誥進階加封丁丑冬公連

遭父母喪時已晉河南叅政服闋改授廣東新會寇作議者以縣治孤危恐先碎賊手公潛師趨賊不意縛其渠魁脅從多得減死賊遂以平詔賜白金文綺乙酉晉雲南按察使持法不阿嘗會論囚巡按某欲出一人公以法爭之不爲出中官某縱下擾民公一裁以法境內肅然丙戌進廣東右布政使與左使梁公協恭宣化利濟居多丁亥擢貴州左轄隨召八爲南京太僕寺卿戊子晉南京大理寺卿嚮用方切而公乃引年復以災異自陳上皆不允尋召改北公在大理慎測情罪廷中稱平上親郊有犯蹕者

下法司欲置重典公奏罪不至死遂得未減上以禮成推恩公遂得進階封三代如制云旣以舊德進用然不能俯仰諧俗懼不能安會雷震午門西樓公自陳不職乃得旨致仕時辛卯夏也公旣退杜門不出惟歲時朝賀則一詣縣行禮天性孝友在邵武時子木舉進士卽圖歸養父聞之詒書戒以報國乃不敢言歸後居母憂悲哀不少忘以昆季居朝夕相與懽如也居常無他嗜好惟以文籍自娛縉紳故舊有頌其德者輒謝不敢當生平恥言人過至屠臺中則數抗疏論切大體直聲凜然爲郡邑時繩墨不敢失尺寸及論犯蹕乃能引去以諍爲國司平公於是加人一等矣子木丁丑進士仕至山西叅政朝議錄公勲乃贈刑部右侍郎以嘉靖癸丑十二月初一日勅葬公于都方山之原賜祭一壇

通議大夫大理寺卿龍湫王公縉墓志銘

韓邦奇

公開人也性貞廉介直正德初開守不理於多口時
適大明黜陟苑洛韓邦奇爲考功員外郎太宰以守
治狀不飾論考功詢之多士皆如太宰言然考功素
知守才疑之往問焉公當飯客考功故久不起公曰
吾當飯客考功請同之公辭不可曰安有戶曹主事
可食而吏曹員外郎不可乎乃出一盂糲食二豆蔬
共食之客去考功以開守問公徐曰開之士大夫皆
曰守治開無狀民則皆謂守良守後得不出考功以

公違衆持公議草具待賓戚獨立佳士也遂定交云
公諱縉字邃伯別號龍湫王氏之先本鳳陽人始祖
玉洪武初避兵於開之別駕里遂爲開州人玉生福
榮福榮生貴貴生溥陽曲縣丞始封承德郎戶部主
事繼贈通議大夫右副都御史配牛始封安人繼贈
淑人生公公童時莊重不羣少長卽知敏學伯右布
政每見而喜曰昌吾宗者此子也弱冠中弘治戊午
鄉試春試不第卒業大學先後所交如浚川王公後
渠崔公蒼谷王公有涯孟公皆海內名士乙丑登進
士授戶部主事是歲夏推恩贈翁及牛淑人皆獲封

尋陞本部員外郎署郎中時權瑾用事羣閹倚勢請
託公不顧未幾贈翁卒於官邸公哀毀如不欲生扶
柩還葬服闋陞河南衛輝知府公振舉宿廢屏除積
奸公移滿案兩造盈庭從容詳處皆中情理儒學諸
生季必嚴試重行賞罰皆始恕而終服丙子當鄉試
監臨東塘毛公以公有文望辟外簾錄文多出公手
毛公喜曰中州之錄可以式矣特疏薦曰知府學問
深邃可學校憲職丁丑當考績時歲荒歉撫按以公
素得人心留以撫之又二年遷湖廣副使初衛輝爲
水陸南北通衢臺省權貴過者連車接轎公惟庭見

一揖耳人固素知公亦不深尤也至湖廣適武廟
賓天羣臣奉皇太后旨迎今上嗣統巨闔谷大
用者八黨之一亦在迎侍中強公長跪公不屈肆行
悖侮公脫冠裂服奔赴王府伏啟王深慰答之而公
卽棄官歸今上登極公上疏奏劾大用奸惡辭甚
激切凡五上而大用斥矣尋起復河南鑛寇王鏜橫
行河朔間公討平之總督奏言副使累經戰陳親冒
矢石故致克捷癸未陞山西右叅政時巨寇黃大寶
標掠殺戮流毒郡邑公擒之當道累疏薦叅政顧改
鴈門行太僕卿公乃乞歸疏凡三上始得允銓部覆
奏謂公有冰蘖之操州守朱君喜其名曰冰檠已丑
薦起四川左布政使土蕃芒部讐殺累年公以恩信
諭平之會牛淑人疾卽具疏乞歸鎮巡僚友懇留弗
顧此泊廣都而淑人卒壬辰春起江西甲午陞都察
院右副都御史巡撫本省地方以恩詔階通議大夫
贈翁牛淑人皆獲贈子行恕廕入太學公撫江西督
逋欠清詞訟禁侈俗理陂塘恤民瘼事關藩臬符驗
頗犯衆怒亦舉行之大者上聞乙未擢大理卿大理
自正德以來避部院尊要久失叅駁之職公力舉行
之由是衆情不堪私比者多不便左遷山東叅政蒞

任疾作乞休不允部移慰留而疾愈甚疏再具未上而公卒矣公入仕來凡四里居耕田讀書絕不干謁有司曲加敬重其取與進退大節無毫髮苟可以對越神明日用居處蕭蕭如寒士平生雖好爲詩文然多不存稿卒後行恕訪之親友僅得三百餘篇痛兄氏早亡撫諸孤若子先世所遺產盡以畀之生成化丁酉卒嘉靖丁酉年六十一歲有司延其主祀於鄉賢祠云

通議大夫大理寺卿浦南胡公岳墓志銘

徐階

我皇上受命中興羣賢景附於時有宣力任事之臣曰華亭浦南胡公諱岳字仲申起家刑部主事歷員外郎四川按察僉事湖廣副使廣西右叅政福建按察使江西廣西右布政使江西左布政使擢都察院右副都御史巡撫江西改大理卿未上卒公爲人以氣節勲業自許事至能立斷爲刑部時慮囚鳳陽大姓甲者與乙爭田鬪不勝因殺叔誣之獄具憚莫敢決至公乃決上之卽位懋選藩臬大吏興圖化理

以公爲才遷四川芒部寇川南公當分巡會病議更
川西奮曰人固有死必川南邪卽督兵入其山斬木
通道二百里募死士塞賊走路大合兵搗之誅若降
若干人捷聞賜白金文綺松潘兵備副使遷東路者
曰是重地且其政廢久非胡某不可使攝胥檄公公
往覈戎籍實庾廩厲侵尅之罰卒以月餉質富室計
其息及十三爲取券焚之居數月粟餘於廩人有餘
力繕甲仗營堡關梁事改於舊諸夷讐焉總憲於閩
數據法直民死罪按賊吏不以御史意假貸語時譏
御史御史至面發赤乃止閱故牘得事之未報者晨

夕下郡縣盡閩之屬檄日常八九至吏傳寫不能給
而公聽讞乃恒有暇手校四書五經及晦菴先生集
翻梓以傳江西吏巧文而輕犯法爲置簿書勾稽以
時遠視廣聽奸至卽發問以禮規御史御史怒公不
爲撓曰吾務盡其在我者治事如初至疾病猶扶掖
以出御史竟不能有加後至者以績聞拜中丞公益
自奮首爲書數千言徧以授羣吏已乃汰冗費更役
法民視產出錢歲不過十一役於官有常期榜懸籍
刻吏無得動郊廟建詔市材楚蜀吏盜官錢更賦民
或張旗幟擊鼓伐金從徒百餘行視民所植出黃紙

封之縛其主怖曰當自輸京師民號泣致厚賄乃免
公嚴爲禁楚人賴以安歲饑手疏以請上爲減所
輸全活甚衆公旣勤於政疾復作迨被徵已艱於行
會聞繼母喪自江西歸其家踰月遽卒公平生於財
廉所至未嘗市民一物其與人處言笑歡謔洞然不
疑然或以不義撻之輒詬怒已又輒霽嘗面折人之
過聞者震懼不能勝及論薦人才終不沒其善交游
姻故雖在寒賤拯援周卹必盡其情然不可干以私
故賢者服其誼不肖者忘其怨宣力任事初若不容
於俗而卒成其名致位通顯蓋非獨所遭際爲然生
成化甲午正月卒嘉靖己亥五月年六十有六

汪文盛傳

廖道南

汪文盛字希周崇陽人父藻爲邑庠弟子員生文盛於學舍穎靈不凡少長肆力於學與兄文明夙夜麗益友愛篤至正德庚午鄉薦辛未進士授饒州府推官時宗藩驕恣悉繩以法構誣逮繫日從狴犴中誦春秋三傳著爲辯說根究理要卒賴廷論白其枉釋之還治適姚源寇起蹂躪德興都御史俞諫陳金檄往視師文盛單騎奮愾悉心規畫多中機宜秩滿召入爲兵部武選主事值佞倖錢寧江彬蠱惑上志誘導南征文盛率同官諫沮械杖於廷濱死者數

今上入統大統擢爲車駕郎中命偕都給事中夏言御史鄭本公清查冗員獨裁抑璫戚蕩滌衰魃羣奸屏息出守福州府首建三山書院以樹標準尋梓兩漢諸史以崇體要而又構羅一峰祠以昭特行表鄭少谷墓以彰幽履濬上王港以資灌溉罷閩越不經之祀省靈濟無益之費築羅源諸邑之城處琉球諸國之貢閩人德之尋母憂歸服闋遷浙江按察副使提督學政肇闡文公正學以闢異論次飭天真書院以育俊髦而又謁白傳坡翁之祠以振高躅弔武穆忠愍之墓以慰忠魂泐龍門以釋何王金許之緒躡

天台以紹劉宋王方之踪禁西湖冶遊以屏侈靡訂東澗鄉約以敦俗尚浙人稱之未幾以父憂歸服闋復補陝西督學甫校士於西安而滇廉訪之命至矣時交人內訌莫登庸竊據篡奪其子方盈稱兵窺伺陳棕黎寧播遷赴愬炎驕驛騷靡有寧宇 上赫然震怒特晉文盛爲僉都御史保釐南詔用邊蠻方乃諭八寨宣布恩威乃詰五邦選厲鋒銳檄留老撾奔附之光紹招納瓊崖輸款之才族於是武文淵獻其地圖武嚴威列其陣法儂承恩贊其闡謀龍鳳翔呈其籌畧陶仙阮仁祐輩恢復爭先阮璟范正毅等投

降恐後刁斗宵鳴於紅衣之寨烽火夙燭於蓮華之灘水截鯨鯢陸剗犀象花涉迴瀾富良失險方盈授馘福海禡魄 上遣咸寧侯仇鸞兵部尚書毛伯温受其降璽書褒寵賜以金綺有差乃陟爲大理卿遘疾歸卒 上賜祭葬所著有白泉文集姪宗元字子允巳丑進士太僕少卿宗凱字子才壬辰進士工部郎中所後宗伊字子衡解元進士初任浮梁令宗召鄉薦

嘉議大夫大理寺卿後菴李公珏墓志銘

許成名

聖天子嗣大歷服之二十八年十一月二十九日大理卿李公致政卒於家訃聞 天子悼焉念公資勞遣官賜祭移鏹調庸治其勞功蓋自我 皇上欽崇典章褒表勲舊近代九卿得此惟艱若公者可謂人臣有終矣公諱珏字廷重別號後菴世爲開人高祖諱山曾祖諱寬祖諱敬父諱成代有隱德俱不仕成以公顯贈承德郎刑部主事成娶吳氏繼孫氏再繼張氏孫實生公孫卒公甫四歲煢然孑立鮮伯叔兄

弟張性嚴公事之能盡其孝張撫公亦不啻已出遂以慈母名公生而嶷然聰明穎悟年十八入郡庠池陽李公嘉祥守開見公所爲文曰此公輔器也深重之弘治領鄉薦乙丑登進士第時以李公爲知人初授長洲縣知縣公年二十有五剪剔吏蠹聽斷詳明遠邇至以神明稱之居二載適逆瑾用事偶以魏公上田誣連至京縣人爭斂金帛饋瑾贖公公正色曰余爲民獲罪若復斂民以脫余豈非益余罪耶峻却之三年陞刑部主事歷本部員外郎中遂菴楊公陸公水村每言法曹中才能明練必曰李廷重部居三載陞東昌知府公政先大體事安民安修葺城郭大建關橋吾郡之人至今誦焉未幾調劇常州甫一載丁張母憂終制補青州府青有鹽鑛多鉅盜公至擒其渠魁撫餘黨悉爲良民郡人欲生祠公公曰捕盜安民有司常事耳何祠焉陞山東按察副使兵備徐州徐爲兩京要衝有司疲於供億民多逃亡公裁浮節冗交際悉有定式公自奉尤約往來雖貴公知厚僅留一飯人亦諒公之廉不以爲慢里甲之困由是少甦時有大盜王鏜聚衆數萬行劫兗濟公選委調集指授方畧戎服督陣火賊穴巢遂蕩平焉總督余

公疏其事以聞賜公白金彩幣陞浙江右叅政一年陞山西按察使公素性明敏剖決如流凡疑獄數年不決者悉解晉人至今稱思焉陞都察院右僉都御史巡撫甘肅抵任三月以福建事被逮回京福建事原公臬晉時所勘也朝見致詞上深奇公丰采異常中貴密示上意曰廷鞫之日若能少順上意諉責巡按豈特脫罪當有不次之擢公笑曰死生榮辱自有定分臨難二心非君子所爲豈敢欺天以徼寵也獄成謫戍廣西潯州去國萬餘里羈配所十餘年安人秦氏偕焉安人以疾卒於廣州安人天性貞淑南戍之日慨然如烈丈夫親識有勸安人勿從者安人曰榮寵富貴每同吾夫今流離患難安忍家居自逸耶聞者莫不嘆服隨行親屬瘴厲而死者自安人以下十有七人公處之泰然畧無怨色尋蒙恩許還里居四載爲嘉靖壬寅時大虜闌入鴈門失守畿甸震驚廷臣交薦召以原職起公提督鴈門等關兼巡撫山西地方公被命毅然就道至之日督率將領行視關隘乃陳禦虜事宜及增兵築邊預定戰守之策上皆嘉納焉遂增叅將四員築邊八百餘里晉人至今賴之又調選民兵分布要害是歲虜不敢南

犯璽書褒獎賜以文綺公居晉一載夜以繼日焦思
運籌寢食俱廢而公之精神已少憊矣引疾乞歸
上不允溫詔褒答公感泣力疾視事再踰月疾增劇
乃瀝誠懇疏 上鑒其忠誠許暫還尋醫仍俟後命
抵家又四載爲戊申遼左不靖 上復起公公至遼
增築屯堡奏調河間青州之技卒添募錦義寧前之
兵馬選用土人之精壯區措大備戊申冬召爲大理
卿時方候代大虜數萬入寇虜意以公將行不復設
備不知公於總帥協謀備預已萬全已遂進督諸路
兵馬嚴申號令設伏扼險鏖戰累日得虜首一百五
十馬三百二十虜器倍焉遼人謂二十年來斬獲未
有如斯之盛捷至 聖心大悅廷臣方議行賞而爲
勘者所擠功遂不錄公在遼雖未久值大虜內侵兵
食之資禦攘之畧非晉無事時比也雖力致膚功之
奏而公之精神又非居晉時比也以是到任未期月
遂上疏乞骸 上允之賜致仕嗚呼向使公疾未痼
久任棘卿雖漠之釋之唐之戴胄其何能加胡公歸
田未久一卧不起惜哉

大理寺卿李公香行狀

傳 鶚

公諱香字汝蘭別號澗山世居分宜之翦溪公生穎敏端重甫五歲卽就塾丙子領鄉薦庚辰中會試辛巳以進士拜都水主事管徐州洪洪近例每民船一納錢十半入官半入夫公痛革之適荒疫頗仍人將相食公多方措糴又勸諭富民周潭等出粟鬻粥賑活內外饑民又錯銀買藥剉置衙前井中令人得自汲疫者以甦其死而無歸者又措銀買民間無碍地安瘞之各碑識其上又查出近洪官地可耕者區畫責成立義倉四爲永遠備荒計徐人至今德之三載

轉刑部擢廣東高肇兵備僉事高肇素苦徭夷焚市
殺官甚至械兵憲曹於山中公計縛其渠魁趙子木
等又計掃大臺尖底兩岡又計殲廣西田州諸山寨
五載之間奇績甚多以妣訃奔歸乙未服除補山東
三月擢山西按察司副使正儀賓殺兄之獄獲噠虜
首級百餘威名丕振以考訃奔歸庚子服除補曲靖
兵備擢福建叅政未幾擢山東按察使已又擢廣西
布政又轉左轄勵廉正嚴閑防清吏胥慎出納風望
崇茂地方倚重獨靖江府汰侈恣肆不可悛化公乃
究其非法懲其尤盛又清復其混擾界地遂致誣捏
之奏禍且叵測賴今上聖明加察當道公論保持
無恙未幾巡按徐公南金有特薦之疏焉戊申年十
月奉簡命進都察院右副都御史巡撫四川諸所興
革張弛彰瘴激揚輿論咸宜之蜀王亦深加愛敬歲
餘進大理卿各方物贐儀及水手諸名色咸峻却之
至瓜州有都蠻距城數百里其酋長偕部下數百人
以彪鎗歛劔及時傳諸葛銅鼓來獻用表歸化之志
公命官屬以冠帶員領授其長十二人因教之以禮
拜又示之訓子弟尚禮義服貢賦之畧諸蠻欣抃叩
謝而去至荊州忽得痺疾坐稽謁謝之期遂諧肥遯

之計時辛亥年七月也公歸怡然自得佳山勝水興
至卽往非禮節不人有司門晚居郡城不以一木一
石累鄉人尤篤孝友事二叔棧杰如父嘗做呂氏鄉
約以風族里又間合族中弟子考德規過有美質勵
志者獎贊勸成窘甚者給資公生弘治甲寅三月五
日年六十三

大理寺卿余胤緒傳

胡直

余胤緒應城人登嘉靖丙戌進士授南京戶部主事
監神策浦口諸倉會計允當大司徒雅重焉戊子秋
同考應天鄉試秉公得名士銓部嘉其錄文卽調吏
部稽勲主事歷陞考功郎中承行六年考察之典且
留意人才考註臧否黜陟甚明不奉要重以不題互
糾新例編管九年關建書舍聚徒訓講甘處澹泊絕
跡公門屢經輔臣臺諫交薦庚子夏吏部題覆不題
互糾新例正是恪遵成憲起補南考功郎中考察執
法甲辰春陞南通政司叅議因母病足三疏告歸以

便養親俱未得允乙巳母痊始赴任七月入賀事竣
領誥命封親迨母捐養執喪中禮朝夕奠後卽解冠
衰以謁父雖畧從吉而哀未少忘也後兩臺交薦庚
戌春補南通政原職是夏陞南太僕少卿至冬轉北
時北虜入寇旣退 上將大興六師撻伐之所急在
馬留心牧養得廐馬數萬以濟辛亥春陞南太僕卿
冬陞南大理卿明啟刑書夙夜詳審務使適中凡廷
讞有疑與僚案相議必執法求生雖秋部都臺或不
欲而其辨益明民自以爲不寃壬子秋又輸入賀事
竣轉大理寺卿會足病偶發謝恩之晨進御道趨馳
不及因乞閒住得歸感恩泣下家居性樂清虛訓第
與子而已自壬子至乙丑十有四年年高德進閱久
望隆屢經公卿臺諫交薦二十餘疏迨 上用人圖
治之典將行而遽以疾卒是爲嘉靖乙丑九月十六
日也

大理寺卿龍池張公夢鯉墓志銘

廷尉公少從塾師遊著聲諸生間乙卯舉於鄉丙辰
成進士歷戶部兵部尚書郎擢開封府尹公之爲開
封潔廉彊力不事權貴人權貴人銜之久之乃遷備
兵靖邊晉山西叅政江西山西藩臬使率皆用久次
遷又久之乃拜都御史巡撫順天再撫甘肅也尋守
大理寺卿貴重矣遂謝病去蓋公於近世功名之際
稱完節篤行君子云公爲人廉治有大節任事多遠
畧郎兵部時屬蒲州楊襄毅公爲尚書每諸郎前白
事顧獨目屬公謂是夫足當大任以故擢開封公治

開封首禡隸人不藉名者累千人晨起坐堂皇剖決立就狡胥無所緣爲奸郡故饒財賦賦所有奇羨吏初不知公則前白是故事以佐公需公怒令答之悉附簿入歲會中邑令進緩贖公笑曰乃公無用爲也悉徙實庾廩有大盜譁於獄閫兵來赴援者匝墻外不敢動公起手劔而入曰敢後者死衆擁入盜皆伏誅初靖邊議貢市文武吏多不廉察失虜心不者以漢財物啖虜恣從之名曰羈縻公至立畫機宜卽市推充市賞不至費縣官一金事聞歲賜金有差而諸邊時方事虜顧虜至輒憂芻粟公憤悉摘發乾沒者於法邊庫悉清虜之盟也議者謂吾且以其暇修守備乃盟日久備日益弛卽功令與斬首虜同功多用虛文相冒無實者公所築鎮邊新障百二十里蓋至今稱雄邊起學宮親爲邊人師帥彬彬比內地治晉田賦卽無論晉以無逋負所條官會之議置犢受輸諸轉置惟隸役任歲省富民數十萬計至今天下郡縣效其法蓋公獨用實心故所舉利便率世世利天下稱便按察豫章取訟師訊得其主名數十人捕治之訟事衰息再治晉爲方伯屬有鑄錢之役公曰是將與民爲政不可急急則銅騰躍耳授民其柄條具

八事繫爲令所鼓鑄文質周郭大行矣順天外備邊
內撫三輔公爲悉裁抑諸不急費歲省徵徭十二萬
已悉取積逋盡白蠲之三輔民大蘇會虜炒蠻寇古
北口遣裨將李如楨等擊破之獲首虜捷聞詔賜白
金文綺東虜土蠻以五萬騎犯遼有詔赴援部裨將
楊栗等擊破之捷聞再賜白金文綺益爵一級而公
亦以是威震諸虜間虜以十萬衆欲窺薊偵薊有備
逡巡不敢入移攻遼公則又赴援遼再破之又再賜
白金文綺而戚將軍繼光時爲大將軍守薊公所與
議兵間同異輒瞋目諍不下已而公策中將軍則穆
然心折也始入守大理卿宣言廷尉與比部御史臺
共執法耳何知形迹論不當者輒反數月所計千餘
牘大辟囚以羅織下獄者全活甚衆夫世稱敦篤重
厚之儒自守有之至涉世不能見功業臨以小威勢
罄折不自勝公平居恂恂不越規範馴篤長者也當
封疆飭法制與利便所至成累世業夫樹功業必於
篤厚老成也信矣公之在開封屬新鄭方貴所示風
旨藩臬大夫皆風靡公獨持不下有扶溝令爲新鄭
黨所愬新鄭持重怒待之公力白其無他卒之無以
奪公然公秩滿以治行高第久乃使守邊以靖邊數

中虜新鄭意也又久之江陵相貴倨甚公無所訕江陵目攝之或謂公宜遜謝公曰吾不能徒步勤造請若廷尉湯也遂謝病歸爲人嚴重孝友與人交無城府然非公事不一見縣大夫仕宦三十年無異寒素異母弟幼一歲而中憲公沒公悉析腴產付之公物天子惻然念邊勞加賜祭葬逾常典尤異數云公名夢鯉字汝化號龍池中憲公則公父贈副使公者也公生嘉靖十二年六月卒萬曆二十五年四月享年六十有五

大理卿潞東張公鹵墓表

馮琦

公諱鹵字召和河南儀封人世有聞者其最顯爲光祿公諱某生某是爲公父公幼警敏受知於鄉先正後渠崔公浚川王公年二十一舉鄉試凡數上春官不第名日益高至己未成進士除婺源高平二邑令乙丑以治行異等徵拜禮科給事中累遷兵科都給事中庚午晉太常寺少卿辛未遷右通政是年九月拜都察院右僉都御史撫浙江以思母雷太恭人棄官歸戊寅詔守舊秩撫保定論功加右副都御史陞大理寺卿坐不能事當路左遷南京太常寺卿乞休

歸凡再薦起不果用而稱考終命乃其磊砢大節執德不回言論風采動天下則雖死猶不死也公性英毅慷慨多大畧持論侃侃無所避初入爲諫議大夫卽論罷附權倖者二人朝論服其強正值 穆宗踐祚公請勤視朝涖經筵廣顧問以隆新政 上嘉納之今 上甫六齡公引累朝立東宮故事以請已復上言僕御左右勢易親情易浹事易習言習入引覃吉懷安事奏慎選內臣給事東邸當是時塞上多事浮議蜩起論者請遣大臣巡邊公疏言責任在已則易成鈐制多則相委兵備不足攝以巡撫巡撫不足攝以總督總督不足攝以巡邊事有難者則互相觀望互相滯格耳以是不果遣官官孟冲以內降有所罪公極言祖宗家法輔臣無不與聞之政法司無不詳讞之刑中旨可邀置廷尉何爲疏入衆爲公危之上知公忠讜不罪也內江相請更營制公已見推爲奉常命未下一日猶草疏極言其不可或勸公已遷官矣願少異公曰未拜命則猶諫官也疏入竟從公議管制皆如故自銀臺擢中丞三領節鉞在金陵殲叛卒馬應祥在河道獲妖人王後溪在保定修三關險阨數百里保障功爲多大璫馮保在公部中乞

公爲建坊公不許以爲勞百姓力媚士大夫尚不可況內璫耶保目攝之而未發也江陵公每與公談滕輒前席旣別與公約事可否具以書相聞公益自發舒引當否無所紕有所薦進及論刺皆獨行其意不阿相君旨久之漸不能平嗾言官論公左遷南京太常卿以去嗟乎言之難也當其抵掌促膝自以爲極知無所不傾竭一語疑而千百語皆疑矣公旣罷凡來與相君語者皆視眉宇頌功德結相君驩又五年江陵公卒向之爲正言者久擯田野無復爲持平論而數年中視眉宇頌功德者皆操戈爲難首用自解免嗟乎言之難與聽言用人之難也張公雖以戇罷然始終孤立行一意尋未必直而尺寸無所枉何必穹階乃稱尊貴哉公喜讀古人書遂於理學言動師薛文清輯薛子名言以自程則其立朝剛正自持非獨氣勝蓋見理明也公先後分校禮闈舉士六十人半爲名公卿而山陰王相公用讜正事明主以道進退世比之王范兩文正蓋得其師之風烈云先大夫宗伯亦公戊辰所舉士不佞以通家末學數侍公識其大者表諸墓道之石生卒年月子女具誌中不具載

大理卿宋公儀望傳

王世貞

宋公者諱儀望字望之其先丹陽太守哲徙吉水爲吉水人巳又徙永豐定爲永豐人公之曾大父邦鉉嘗輸粟助邊拜綵幣羊酒之賜里人榮之大父七品散官魁昂父聞義以公貴贈吳縣令再贈御史公之爲諸生也數試於有司輒冠然省試輒屈旣薦卽第進士爲吳縣令未幾卽擢河南道御史移疾歸復爲御史御史未幾卽超爲大理寺右丞巳落職補知夷陵州未上卽拜霸州兵備僉事亡何超爲大名兵備副使移監福建軍尋削二秩需次久之補四川按察

僉事卽復爲其按察之副使移視福建學政以婦卒
自免歸道遷其省參政卽入爲太僕少卿甫上遷大
理左少卿遂進都察院右僉都御史巡撫南直隸提
督軍務糧儲久之以功遷右副都御史改南京大理
寺卿已轉大理卿有所齟齬乞歸需次里中而公卒
矣公之成進士自丁未以至戊寅踰三十載一居憂
一移疾一自免再坐謫再需次而其起家與遷移之
峻且速大畧亦相當公之不出天下以爲非公無可
與任者而及其旣出則躡而肘之必不使其有以自
遂其在下位苟遇一名缺亦必念及公以爲非公不

足當而旣遷之後復喟喟訾訾互相指目以躡致累
公蓋公之才識果敏精神煥發足以鼓舞人之視聽
而時亦一中其忌至於道骨勁挺高論橫溢必不肯
舍已而徇人之好其忌者與知者錯而爲公屈伸最
後知公者方柄國舉東南腹心之地以委公公亦竭
其力以大有顯見天下方延頸冀公之大用而卒不
勝其忌者公亦老且不起矣嗚呼人耶天耶始公令
吳而其邑人猶少之公不動聲色發擿奸弊如神胥
吏洗手而治念諸區所苦者長賦而長賦所苦者長
運往往破家公倡諸區各出公田以贍之所出田畝

計本受田爲差次卽貴勢無得免者民以不困虜十
入寇餉不計大司農計專官併責吳舊賦人洵洵且
竄公白郡榜慰之而條處其緩急竄者復矣乃與比
邑合而置義塚於六門之郭禁毋得水火葬吳俗幾
變言公偃故吳人公創文學書院以祠之與諸生講
道肄業其中後皆出爲名公卿如今魏郡太原二相
國其表表者公旣精於法比時時麗情兩造數百人
不踰時解去而他所經畫樽節皆出人意表故旣徵
而人爲尸事之爲御史時上書論大將軍仇鸞擁勁
兵居肘腋挾虜自重無人臣禮時鸞恃寵驕甚聞者
爲縮舌 上雖內私鸞而無以易公寢不下未幾鸞
死事露僂屍及妻子公意益發舒陳時務十二策爲
識者所重出按河東齏持法亡所徇許齏賦簡少事
公創河東書院申東越之學以與諸生講習多興起
者移疾歸省母病痊復爲御史司大計時公之鄉人
宰相有暱子橫而貪公欲糺之不果因論邊事遂及
東南而以督臣胡之淫侈撫臣阮之婪荒請攝治之
二臣暱子之心膂也以是不說公而會公督視三殿
大朝門又中貴人議工直日一鑲公不可又欲悉易
殿趾石公又不可第易其燬弗堪者而暱子私賈人

五千金屬工部歐陽尚書者辟與工事公又不可於
是衆怨叢矣公之遷大理丞暱子自以爲公功公無
所報謝而遂巡引避以請急歸適風霾變宰相欲有
所廢樹及大計吏而尚書遷吏部與暱子比而謀謫
公公之兵備霸州也前是有西寧侯者道其地盜夜
迫之倉皇溺死盡剽其資財詔捕之格甚峻公鉤得
其渠魁悉置於理霸人懼公威神竟公任無竊發者
涿爲畿南輔公請城之最爲堅完又疏豁洪武以來
養馬逋稅民大悅其自大名移閩監軍名爲材公而
寔遠之且困以兵事後太宰於公按離時有所不悅
故也公至閩於大帥戚繼光合策破倭鹵斬無算入
與棘事所撰程式義冠一時籍籍稱公有文武材而
計吏之謫復下矣太宰修前指必欲斥公以快而考
功郎一儒力持之曰宋某材且法不至斥必斥宋郎
請先斥郎乃止議謫而公方從容遊武夷賦詩歸而
灌園意甚適也屬邊事棘廷薦公者前後十八疏於
是公補四川按察僉事以至復爲副使視福建學政
一以 高皇帝卧碑訓諸生而時刻東越理性諸書
翌之所以鼓舞振德尤備自是叅其省政佐太僕大
理皆不久遷無可見者其撫南直隸九郡則自江陵

張相國居正所謂知公者也公故令吳深曉民間疾苦與吏弊風俗至則一切務爲寬大而於雲間金壇溧陽豪貴人之匿賦而以重累單赤者亡所縱貸諸郡邑中水公上書請減歲租發儲粟以賑水不大災是時海警稍解吏士諱言兵而公獨與兵使者王叔杲計益修餘皇練卒伍飭戎器申嚴賞罰亡幾倭果狎至公遣舟師三覆之於外洋俘斬虜口奪仗器甚衆公於清濁靡所不揚激而所敦勵尤在忠節曾有詔雪靖難死事諸臣公謂金陵其死事所也建表忠祠聚而祀之公之鄉人宋楊邦乂以不屈女直死江寧其祠與墓在焉而墓且湮矣公行求得之爲置封樹因故祠陞宮而歲饗薦焉太常卿袁公洪愈國子祭酒姜公寶皆里居非相國所急而姜尤甚公力薦之意與左使瑣臣繩公公不顧人以是知公雖以材見器相國要之不苟爲附離者坐與御史論鹽盜事相異同公廷辯不少屈雖入爲廷尉猶用前隙指訾公公所部一郎病狂易嘗闌入交戟肆侮公置弗較也而郎猶時時毀公偶有中之者遂繼及之相公紉其說然猶小停公任以解公遂決意不復出以至卒海內咸惜之得年六十有五耳公生而磊落感慨有

大人志一日讀未史至秦檜陷岳武穆事掩卷而嘆
贈公怪之對曰令兒生其時不飲血而碎檜首者有
如日又讀唐史裴度傳所謂賊滅則朝天有期賊在
則歸闕無日大嗟泣曰壯哉男子當如此耳贈公謂
公當以名義見媿且必能爲縣官致死力公工於舉
子業負重名然好習史漢書及少陵氏詩善其言矣
偶從鄉先生聶貞襄公豹所得聞東越良知之旨而
服膺焉東越者故王文成公守仁也公遂游貞襄公
門已又游歐陽文莊公德鄒文莊公守益門貞襄及
兩文莊公皆重公以爲能負荷大事最後印證於故
羅文恭公洪先其詣醇深時方議以文成公從祀孔
廟而拘儒或難之公曰是未易以口舌爭也乃著或
問一篇反覆數千言大較謂堯舜開道心精一之傳
未嘗求理於物格心於外孔門大學首言明明德明
德卽道心之靈覺不昧者然則明明德之功要在致
知而訓詁之士乃謂致知者推極其知識是求之物
而格之外也文成公指而示人曰致吾心之良知而
已足知也孟子之所謂孩提之知愛知敬顏子之有
不善未嘗不知也然則得大學之本旨而上遡堯舜
精一之傳者無如文成公公之或問出見者無不爽

然後十餘年卒以文成公論祀公於學能識其大其
爲人氣豪不帖帖細瑣然內行特純篤贈公有五子
公最晚舉能得其心歿而公哭之毀悉其婦橐裝以
營喪葬母太夫人九十矣大會客稱觴爲樂比畢會
人而視省者四五公時已踰艾猶蒸蒸然孺子慕也
所受產室悉以讓諸兄兼爲行履得好田圃輒買益
之推而至於三族之親以逮疎者又推而至於交知
及間左亡不沾公之德以爲恒卒然有凶吉取之若
寄公亦自忘其德於人少喜其邑之陽山以自號有
詩曰陽山稿晚撫吳又喜句曲之華陽蓋裛其詩文

目之曰華陽館集始子子仲兄之次子瑜已而自有
子曰翊曰玘曰珽有女婚嫁皆名族詳胡觀察行狀
中

大理寺左少卿胡閏

附文郡奴

胡閏字松友江西鄱陽人少與吳存何英徐素爲同志友講業長沙王吳芮祠中以忠義相砥礪太祖征陳友諒至鄱陽見祠壁題竹詩幽人無俗懷寫此蒼龍骨九天風雨來飛騰作靈物問祠中人曰此誰詩對曰里中儒生胡閏陰記其姓名以去後應辟至上曰此題詩鄱陽廟壁者耶授都督府都事進經歷建文時以直諫選爲右補闕累進大理寺少卿靖難兵起與齊黃輩日夜密謀設法防禦遜國後召方孝孺草詔繼召閏及高翔數人者衰經至哭聲徹殿

廬 上召閏先入諭令更服閏曰死卽死耳不可更
上以族誅恐之閏不屈命力士以金瓜擊其齒齒
盡聲不絕 上怒縊之死以石灰水浸脫其皮草
之懸武功坊卽日籍其家子傳道論死傳慶成邊宗
族夷滅謫戍者甚衆女郡奴時四歲其母汪縛就刑
郡奴自懷中墮地一卒提入功臣家付爨下婢收之
郡奴昏睡夢與父母相持泣覺則抱一猫卧也稍長
識大義髮至寸卽自截去日以灰汗面禿垢不作人
狀苟活二十餘年功臣家不以人畜之洪熙初赦諸
死事者苗裔郡奴得同女輩乞丐歸鄱陽貧無所依

鄉人憐之曰此忠臣女也爭餽遺不絕郡奴所受免
死而已年五十六而終尚處子也鄉人謚曰忠胤貞

姑嘉清

提學副使邵銳立祠祀之萬曆二十年鄱

陽守楊際會鄱

陽

儲昌祚附祀郡奴於其父閏祠

大理寺少卿薛崑傳

薛崑陝西閩鄉人慷慨負志操有口辯洪武間累官大理少卿革朝特見信任辛巳北兵日南王師屢敗方孝孺草詔令崑賫至燕軍又作官諭數千紙付崑密散將士使歸心朝廷崑至師說曰上言殿下且釋甲謁孝陵暮卽下令旋師潛邸叱其給已崑不能對左右欲殺之潛邸曰此天子使也釋之謀遂不行京師定免崑死謫廣西永樂初安南國王爲黎季犛所殺其孫陳天平自老嫗來歸季犛子蒼澄請還

上命廣西總兵官都督黃中以兵五千送歸國舉崑

為輔行至其站伏發劫天平崑被虜死

行在大理寺右少卿傅啟讓傳

實錄

行在大理寺右少卿傅啟讓湖廣石首人由進士擢河南按察僉事清慎有為吏畏民服嘗奏築隄以禦河水上從之就命啟讓董其役農民德之九載考最當陞河南吏民奏乞留之命復原職陞正四品祿尋陞大理寺少卿讞議公平宣德六年六月以督餉浙江還得風疾奏乞致仕從之

大理寺左少卿簡庵沈公榮墓志銘

正統己巳秋大理寺左少卿沈公致政歸景泰癸酉
四月九日卒於家距生洪武己未六月年七十有四
公諱榮字民望松之華亭人大父諱德輝爲郡史寬
獄賴以平反者甚衆事載郡志父諱易初爲諮議叅
軍棄去授徒於鄉清苦刻勵嘗取古今詩關五倫者
爲序以授學者妣顧氏二子長度字民則官至翰林
學士次卽公也初公之父以民則贈翰林院侍講學
士妣贈宜人終以公加贈中憲大夫贊治尹大理寺
左少卿妣進恭人公幼穎敏異常兒八歲通孝經語

孟十歲善真草十三父母俱亡兄謫遠戍而公獨閉
戶讀父書疑難輒走父執所靳釋家貧無楮日懸腕
書壁筆力遂大進鄉人長老咸異之率遣子弟從游
歲致百數公尚垂弗坐上座毅然教之有成法人固
知沈氏之有子矣 太宗皇帝臨御勵精文翰民則
首起官翰林繼召公同事秘閣授中書舍人於時誥
勅填委既視草學士以下班書之解大紳胡光大輩
皆擅名於書者獨公兄弟書 上視之加喜焉民則
婉麗莊重公書飄逸迥勁雖出一家而各臻其妙凡

歲貢升進書判命書賜二品金

織木特置象笏金縷公姓名以賜皆與兄同題 大

宗皇帝 仁孝皇后 仁宗皇帝 三聖主則獨命

公公所受賜金幣每歸爲兄壽時兄爲學士公爲侍
讀人識與不識以大小學士稱之而不名兄子藻門
人陸友仁輩皆以善書進授中書舍人一時兄弟叔
侄師友並居清密而沐寵賚罕與爲比 宣宗皇帝
臨御賜告歸展墓畢謁故當盛暑徒步不以騎乘鄉
里稱之還朝陞右春坊右庶子秩滿陞大理寺右少
卿 今上卽位遷左少卿贊治尹予誥加贈其父公
事 上以勤慎簡約被顧問一以正對所以受知

列聖寵遇優隆服用珍異晚乃勅於真書惟樂行草
蓋出入宋仲溫陳文東而得其三昧戶外求者屢恒
滿暇則與客彈棋賦詩一切世務泊如也甫七十語
藻曰古二疏何人耶遂偕致仕歸歸乃盡出所賜金
營湯老堂於故址日聚親族朋舊燕飲其中性孝友
恨養弗逮每時享墓祭泣如初喪敬兄如父愛侄如
子交友一以誠有過則婉諷冀其能改遇材士務汲
引襟度閎爽鬯達不屑屑於細故因自號簡庵詩文
興至輒就諸體克備而得意處多膾炙人口是雖以
書顯而學與行能自植以蔚起聲望於士林

